

Obezbijeđeno vodosnadbijevanje
bez redukcije tokom čitave godine.
Odvodnja i zbrinjavanje otpadnih voda
u punoj funkciji u Tešnju.



POGLED NAPRIJED 2028

Tešanj – 29. februar 2028. – 0,00KM




Poljoprivreda Tešnja život znači



Poljoprivreda je uvijek bila i sada će i ostati okosnica naše zajednice! Modernizacija poljoprivredne proizvodnje i podrška malim poljoprivrednicima bili su prijeko potrebni za održavanje naših tradicionalnih vrijednosti. U jednom trenutku, pomoć Općine Tešanj je poljoprivrednicima pružena kao važnija od kiše tokom ljetne suše.

Tešanj je uvijek i želio i volio kulturu!

Kultura je srce Tešnja, a kroz očuvanje i promociju bogate baštine, te razvoj kulturnih institucija, stvorili smo živopisno okruženje koje inspiriše i privlači turiste, ali i ono najvažnije – čuva identitet Tešnjaka!



OBRAĆANJE NOSIOCA LISTE

Dr. Dujsić Amir



OBRAĆANJE KANDIDATA ZA NAČELNIKA



ADNAN LIHIĆ

vodosnabdijevanja i kanalizacije u Tešnju

Tešanj je osigurao stabilno i kontinuirano vodosnabdijevanje za sve građane, bez redukcija tokom čitave godine, zahvaljujući naporima Naprijed! Tešanj. Projekat je uključivao proširenje vodovodne mreže, izgradnju novih kapaciteta za zahvatanje i distribuciju vode, te modernizaciju postojećih cjevovoda. Smanjeni gubici vode i savremeni uređaji za monitoring omogućili su pristup čistoj vodi za svaki dom, čak i u sušnim periodima. Ovaj napredak postavio je Tešanj kao primjer održivog razvoja u regiji.

Paralelno, završen je i dugo očekivani projekat izgradnje modernog kanalizacionog sistema, koji je započet krajem 2008. godine. Ovaj projekat je konačno realiziran zahvaljujući naporima Naprijed! Tešanj. Instalacija najsavremenijih uređaja za prečišćavanje

otpadnih voda osigurava da se voda, nakon upotrebe, adekvatno preradi prije vraćanja u prirodu, čime se značajno smanjuje zagađenje okoliša. Ovo znači da Tešanj više ne ispušta u prirodu ogromne količine neprečišćene vode!

Sada je Tešanj spreman odgovoriti na izazove budućnosti glede vodosnabdijevanja i kanalizacije za domaćinstva i privredne subjekte.



Foto: Smith1972/shutterstock.com

Naša općina sada znatno manje zagađuje okoliš zahvaljujući prerađenoj vodi, što je veliki korak Naprijed u zaštiti okoliša i očuvanju zdravlja naših građana. Bilo je važno vratiti fokus na ove važne projekte, uložiti maksimum napora kako bi se priveli kraju jer osim što su ti projekti strateška odrednica Vizije Općine Tešanj, oni su bili i obaveza zbog naših građana. Završetkom ovih projekata, Tešanj se sada

ponosi vrhunskim standardima vodosnabdijevanja, javne higijene i zdravlja, što je ključ za kvalitetan i siguran život svih građana. Tešanj je, međutim, sada ipak više ponosan na transparentan rad javne uprave koja radi u interesu građana Tešnja i nema šta da krije jer sve što radi – radi zbog Tešnja i njegovih građana.

Priče sa kojima se ponosimo

Tešanj – grad u kojem mladi uspješno razvijaju svoju budućnost

Mladi su sadašnjost Tešnja i zahvaljujući naporima javne vlasti koju predvodi Naprijed! Tešanj, stvoreno je moderno okruženje za obrazovanje, zapošljavanje i razvoj mladih.

Tešanj je uvijek imao razlog da se

ponosi svojom omladinom, uspješnom i inovativnom. Danas se omladina može ponositi i svojom Općinom Tešanj! Kroz programe stipendiranja, podršku mladim bračnim parovima, rješavanje stambenog statusa, zapošljavanje i razvoj omladinskih centara, omogućili smo mladima da ostanu u Tešnju i grade svoju budućnost. Zahvaljujući angažmanu stranke



Foto: radiotesanj.ba

Naprijed! Tešanj, pristup vrtićima je poboljšán, subvencionirani troškovi za roditelje su osigurani, moderna igrališta su izgrađena, programi za mentalno zdravlje u školama su implementirani, a sigurnost djece u saobraćaju je povećana.

Karijerna savjetovanja su uvedena, stipendije srednjoškolcima su pružene, lokalne platforme

za zapošljavanje mladih su kreirane, a osnovani su i centri za inovacije. Vijeće mladih je osnovano s fokusom na rješavanje problema mladih, dok su volonterski programi organizirani u saradnji s lokalnim privrednicima. Ove inicijative su omogućile mladima sticanje radnog iskustva, razvoj novih vještina i doprinos zajednici.

Tešanj ima mlade koji su osnaženi, obrazovani i spremni da doprinesu razvoju zajednice. Oni su i sadašnjost i budućnost naše općine. Sve što radimo, radimo zbog njih jer smo odgovorni kakav ćemo i kakav im želimo ostaviti Tešanj u naslijeđe a oni će sigurno razvijati Tešanj još brže i snažnije!

Tešanj: Stvoreno okruženje za uspjeh žena



Foto: avaz.ba

Kroz edukaciju, zapošljavanje i podršku poduzetništvu stvoreno je okruženje u kojem žene imaju jednaku priliku za uspjeh i napredak.

Besplatni kursevi i radionice za žene svih starosnih dobi su organizovani, kao i posebni programi za tehničku i digitalnu obuku. Finansijska podrška ženama poduzetnicama putem poticaja i mentorstva je pružena. Mreža vrtića i dječijih centara

je razvijena kako bi ženama bilo omogućeno lakše balansiranje između poslovnih i porodičnih obaveza. Žene su dobile podršku da budu stub porodice i da grade bolju ekonomsku sliku Tešnja. Programi za zaštitu žena od nasilja su uvedeni, sigurna kuća je uspostavljena, a edukativne kampanje o pravima žena su organizovane.

Cilj je bio osigurati jednake prilike za žene u svim sferama društva i podstaknuti njihov aktivan doprinos razvoju zajednice. Implementacijom programa koji podržavaju obrazovanje, zapošljavanje, zdravstvenu zaštitu i političku participaciju žena, stvorena je podržavajuća okolina za žene i njihove snove i ambicije. Tešanj sada ima osnažene, obrazovane i zaposlene

žene koje aktivno doprinose razvoju zajednice. Sve ovo omogućeno je zahvaljujući trudu i radu ekipe iz stranke Naprijed!



Foto: zena.net.hr

Tešanj je uvijek i želio i volio kulturu!

Kultura je srce Tešnja, a kroz očuvanje i promociju bogate baštine, te razvoj kulturnih institucija, stvorili smo živopisno okruženje koje inspiriše i privlači turiste, ali i ono najvažnije – čuva identitet Tešnjaka! Osnovana je Turistička zajednica općine Tešanj,



podstaknut je razvoj kulturnih događaja i festivala. Obnova Centra za kulturu i obrazovanje samo po sebi ne donosi poboljšanje kulture, stoga je značajnim finansiranjem podržan rad pozorišta, omladinskih udruženja i svih ostalih koji su bili spremni svoje ideje i energiju staviti na raspolaganje da bi kreirali sadržaj za Tešnjake.

Priče sa kojima se ponosimo

Poljoprivreda Tešnja život znači



Foto: opcina-tesanj.ba

Poljoprivreda je uvijek bila i sada će i ostati okosnica naše zajednice! Modernizacija poljoprivredne proizvodnje i podrška malim poljoprivrednicima bili su prijeko potrebni za održavanje naših tradicionalnih vrijednosti.

U jednom trenutku, pomoć Općine Tešanj je poljoprivrednicima pružena kao važnija od kiše tokom ljetne suše. Sveobuhvatna analiza poljoprivrednog sektora je provedena kako bi se identificirali problemi i potencijali. Edukacija poljoprivrednika sa fokusom na moderne tehnike uzgoja i korištenje novih tehnologija je organizovana. Projekt protivgradnog sistema je

završen u suradnji sa susjednim općinama, osiguravajući zaštitu usjeva od vremenskih nepogoda. Poljoprivredne zadruge i otkupne stanice su uspostavljene, a finansijski poticaji za kupovinu moderne opreme i implementaciju održivih praksi su pruženi. Posebni programi za mlade poljoprivrednike su osigurani kako bi se potaknula njihova uključenost, ostanak u ruralnim sredinama i preuzimanje posla od roditelja. Ambulante u mjesnim zajednicama s većim brojem stanovnika su izgrađene, kao i trotoari i igrališta za mlade. Potencijalne lokacije za seoski turizam su identificirane, a staze i šetališta su izgrađeni. Tešanj sada ima modernu, konkurentnu i održivu poljoprivredu, te prkosi globalizaciji i čuva svoje tradicionalne vrijednosti, ne zaboravljajući našu prošlost.



ADNAN LIHIĆ

KANDIDAT ZA NAČELNIKA

Poštovani građani,

Obraćam vam se kao kandidat za načelnika Općine Tešanj s entuzijazmom i odlučnošću da zajedno izgradimo bolju budućnost. Tešanj se nalazi na prekretnici: na ovim lokalnim izborima, građani će birati između stagnacije i napretka. Mi u pokretu Naprijed! vjerujemo u svijetlu budućnost jer smo spremni graditi je na temelju novih ideja i energije. Ponosni smo na postignuća naše zajednice, ali znamo da možemo i moramo ići Naprijed! ka boljem.

Naš grad zaslužuje stabilno i čisto snabdijevanje pitkom vodom, te efikasnu odvodnju i preradu otpadnih voda. Vodni resursi su od vitalne važnosti za naše zdravlje i svakodnevni život, stoga ćemo se zalagati za modernizaciju vodovodne i kanalizacione infrastrukture. Prometne gužve i nedostatak parking mjesta su problemi koje ćemo rješavati zajedno.

Kulturno-historijsko naslijeđe našeg grada je blago koje treba očuvati. Tešanj s bogatom historijom mora biti sačuvan za buduće generacije. Fokusirat ću se na poboljšanje sportskog ambijenta i stvaranje boljih uvjeta za mlade kroz izgradnju novih objekata, podršku sportskim klubovima i organizaciju manifestacija koje promoviraju zdrav život i zajedništvo.

Briga o porodici i starijim licima je od ključne važnosti, i tu ću uložiti dodatne napore kako bi svi naši sugrađani osjećali sigurnost i podršku. Planiramo razviti programe socijalne podrške, povećati dostupnost socijalnih usluga i osigurati adekvatnu njegu za starije osobe. Porodice su temelj našeg društva i moramo osigurati da imaju sve što im je potrebno za dostojanstven život. Poljoprivreda i privreda će biti ključni za naš razvoj. Novi moduli podrške bit će usmjereni na ove sektore, pružajući resurse i prilike za rast. Saradnja s dijasporom i privlačenje stranih investicija će takođe biti prioriteti za osiguranje prosperiteta i novih mogućnosti.

Tešanj neki često nazivaju Europskim, ali taj epitet se uglavnom odnosi na naše vrijedne i sposobne privrednike, dok naša javna uprava zaostaje. Razvoj Tešnja mora ići brže, ne samo kroz podršku privredi, već i kroz razvoj kulture, sporta, zdravstva, socijalne skrbi, prilika za mlade i žene. Na taj način gradimo Tešanj u kojem građani, a posebno mladi, žele ostati i graditi svoju budućnost.

Naša vizija je Tešanj kao mjesto gdje svaki građanin ima jednaku priliku za prosperitet, gdje su institucije transparentne i efikasne. Zajedno možemo napraviti značajne promjene i osigurati da Tešanj napreduje i raste. Tešanj može biti lider u inovacijama, kulturi i sportu.

Tešnju treba novi načelnik za novi početak.
Hvala Vam!



AMIR DUJŠIĆ

NOSILAC LISTE ZA VIJEĆE

Poštovani stanovnici općine Tešanj

Kao nosilac liste za Općinsko vijeće ispred stranke Naprijed! Tešanj, obraćam vam se s ponosom i odgovornošću. U našem timu, koji čine kandidat za načelnika i kandidati za Općinsko vijeće, imamo zajedničku viziju razvoja naše općine i spremni smo zajedno sa vama raditi na njenom ostvarenju. Naša lista za Općinsko vijeće, ne predstavlja samo skup pojedinaca, nego tim koji u većini čine mladi, obrazovani ljudi koji dijele zajedničke vrijednosti i ciljeve, bez mrlji iz prošlosti u životu i radu na području naše općine. Svjesni smo izazova s kojima se suočavamo na lokalnom nivou – od pitanja zapošljavanja, poboljšanja javnih usluga i javne administracije, pa do osiguravanja boljih uvjeta za obrazovanje i podršku mladima. Naš tim će aktivno raditi na rješavanju ovih problema, koristeći znanje, iskustvo i inovativna rješenja koja će Tešanj učiniti boljim mjestom za život, sa pravednim pristupom u rješavanju problema – jednakom šansom za svakog stanovnika općine Tešanj. Kao ljekar, specijalista interne medicine, subspecijalista kardiolog svjestan sam važnosti zdravlja i kvalitete života, ne samo pojedinca, već cijele zajednice. U budućem radu fokusirat ćemo se na unapređenje zdravstvene zaštite, ekonomski rast, ekologiju i zaštitu prirodnih resursa. Takođe, poboljšat ćemo komunalnu infrastrukturu kako bismo osigurali bolji i sigurniji život za naše sugrađane.

Pozivam vas da nam date podršku, jer samo zajedno možemo napraviti promjene koje su nam potrebne. Podržite našeg kandidata za načelnika koji kao dio ovog tima dijeli istu viziju napretka. Podržite našu listu za Općinsko vijeće, jer su naši kandidati ljudi koji su spremni uložiti svoje znanje, energiju i predanost u izgradnju bolje budućnosti za sve nas.

Zajedno, kao tim, možemo ostvariti ciljeve koje smo postavili i osigurati da Tešanj bude općina kojom ćemo se svi ponositi, a Tešanj kao sredina će se ponositi sa nama kao pojedincima.

Zato vas molim za vašu podršku – podržite nas, jer mi smo vaš tim!
Odlučno Naprijed za bolji, snažniji i ljepši Tešanj!
Uz želje za puno zdravlja, hvala vam na podršci !!!





2 Zerina Ćeman

Zerina Ćeman, rođena 1986. godine, dolazi iz mjesne zajednice Jelah. Diplomirani je ekonomista i certificirani računovođa s bogatim profesionalnim iskustvom. Trenutno je zaposlena kao računovođa u AGRO ĆEMAN d.o.o. Jelah. Zerina je svoju karijeru gradila u firmama poput DUKAT d.o.o. Jelah, ĆEMAN-ENERGOPROM d.o.o. Jelah i knjigovodstvenom servisu AUROM d.o.o. Matuzići, stječući pritom dragocjeno iskustvo i stručnost. Razumije izazove i potrebe porodica u našoj općini. Zerina se posebno zalaže za bolje prilike žena u biznisu, vjerujući da žene preduzetnice mogu značajno doprinijeti razvoju naše zajednice. Njen cilj je stvaranje okruženja koje će omogućiti ženama da ostvare svoj puni potencijal.



3 Adem Kurdić

Adem Kurdić, rođen 1974. godine, dolazi iz mjesne zajednice Bobare-Drinčići-Blaževci. Tokom agresije na BiH, bio je pripadnik Armije RBiH, diverzantsko-interventnog voda 3. bataljona 207. Viteške brigade Pousorska ljuta. Adem je privrednik zaposlen u porodičnoj firmi Color Karton doo Bobare. Vodi i učestvuje u brojnim projektima na prostoru mjesne zajednice i šire. Aktivno je uključen u humanitarne akcije, što pokazuje njegovu posvećenost zajednici. Kao zamjenik predsjednika Naprijed! Tešanj i aktuelni općinski vijećnik te predsjednik kluba vijećnika Naprijed! u općinskom vijeću Tešanj, Adem dobro poznaje lokalne probleme i posvećen je unapređenju sigurnosti življenja u Tešnju.



4 Fahrudin Pezer

Fahrudin Pezer, rođen 1982. godine u Doboju, živi u Kraševu. Završio je osnovno obrazovanje u OŠ „Kulin Ban“ Tešanjka, te Elektrotehničku školu u Tešnju, gdje je stekao zvanje elektro tehničara energetike. Od 2005. godine, Fahrudin aktivno sudjeluje u društveno-političkom životu općine Tešanj i mjesne zajednice Kraševo. Obavljao je funkcije predsjednika Savjeta MZ Kraševo i člana Skupštine MZ. Trenutno je predsjednik upravnog odbora Kulturno umjetničkog društva BEHAR Tešanjka i aktuelni vijećnik u Općinskom vijeću Tešanj. Fahrudin Pezer dobro poznaje lokalne probleme i izrazio je aktivan u lokalnoj zajednici. Spreman je pomoći svima i svugdje, te se zalaže za unapređenje kvaliteta života u općini.



5 Alema Jabandžić Deljić

Alema Jabandžić Deljić, rođena 1994. godine u Tešnju, dolazi iz Dobropolja. Diplomirani je bezbjednosni menadžer i magistar prava. Svoju profesionalnu karijeru započela je kao računovođa i poslovni sekretar u MADI d.o.o., gdje je radila od 2013. do 2019. godine. Trenutno radi kao viši referent za ovjeru potpisa, prepisa i rukopisa u Općini Tešanj. Alema je predsjednica Komisije za ravnopravnost spolova i pitanja mladih pri Općinskom vijeću Tešanj. Također, aktivno je angažovana kao potpredsjednica Naprijed! Tešanj, predsjednica žena Naprijed! Tešanj i članica glavnog vijeća Naprijed BiH! Alema se zalaže za poboljšanje statusa žena i sigurnost žena u našoj zajednici.



6 Ernad Deljić

Ernad Deljić, rođen 1991. godine u Doboju, živi u Tešnju, gdje je završio osnovno i srednjoškolsko obrazovanje. Od 2020. godine aktivno je angažovan kao općinski vijećnik, posvećen rješavanju problema sugrađana i unapređenju zajednice. Ernad je ponosan na svoju inicijativu za stambeno zbrinjavanje mladih u Tešnju, kao i na razvoj pješačkih i biciklističkih staza na Crnom vrhu. Ove inicijative smatra ključnim za unapređenje kvalitete života i održivi razvoj zajednice. Njegova posvećenost i vizija donijeli su konkretne promjene koje su poboljšale svakodnevni život stanovnika Tešnja. Pored toga, Ernad je završio edukaciju o programiranju i upravljanju CNC mašinama, čime je obogatio svoje iskustvo i stekao dodatne vještine.



7 Dženana Krličević Karahmet

Dženana Krličević Karahmet, rođena 1990. godine u Tešnju, živi u Jelah Polju. Diplomirala je na Zdravstvenom fakultetu Univerziteta u Zenici kao medicinska sestra, a zatim magistrirala zdravstvenu njegu i menadžment. Njena profesionalna karijera započela je kao volonter u Općoj bolnici Tešanj, gdje je radila na hirurgiji i internom odjelu. Trenutno radi kao profesor u JU Srednja tehnička škola Tešanj. Dženana je aktivno uključena u društvene i zdravstvene aktivnosti kao aktivista Crvenog križa. Također, radila je kao savjetnik na nivou ZE-DO kantona u Pedagoškom zavodu, gdje je doprinosila razvoju odgojno-obrazovnih ustanova. Dženana se zalaže za poboljšanje statusa žena i sigurnost žena, te unapređenje zdravstvenih usluga u našoj zajednici.



8 Muhamed Džihić

Muhamed Džihić, rođen 1979. godine, dolazi iz Orašja Planje. Magistrirao na međunarodnim odnosima na Corvinus Univerzitetu u Budimpešti. Njegova bogata karijera uključuje rad na poziciji VD direktora TRA Agencije za razvoj Općine Tešanj te kao projekt menadžer u istoj agenciji od 2010. do 2016. godine. Trenutno je zaposlen u privatnoj firmi Agroproduction d.o.o. Muhamed je društveno angažovan, bio je predsjednik UG Cerovac i aktuelni je predsjednik Airsoft kluba ASK FETH. Također je član Glavnog vijeća NAPRIJED BiH!. Posjeduje certifikate iz oblasti pisanja EU projekata i unapređenja lokalnog ekonomskog razvoja. Muhamed će se zalagati za bolji status poljoprivrednika i stvaranje boljih prilika za poljoprivredne proizvođače u Tešnju.



9 Sanela Ganjgo

Sanela Ganjgo, rođena 2000. godine, dolazi iz Mrkotića. Trenutno je apsolvant na Prirodno-matematičkom fakultetu Univerziteta u Tuzli, gdje studira Primijenjenu hemiju. Srednje obrazovanje završila je u Srednjoj tehničkoj školi Tešanj, gdje je stekla zvanje farmaceutskeg tehničara. Sanela je aktivno uključena u društvene aktivnosti kroz volontiranje za Omladinsko udruženje „Mladi Mrkotić“. Također, učestvovala je na seminarima „Inovativni pristup studiju hemije u Bosni i Hercegovini“ i „Primijenjena hemija“ u Tuzli. Sanela se zalaže za bolji status studenata i onih koji traže prvo zaposlenje. Njena posvećenost obrazovanju i mladima čini je važnim dijelom tima Naprijed! Tešanj.



10 Enes Hadžić

Enes Hadžić, rođen 1988. godine u Doboju, osnovnu školu završio je u Medakovu, a Opću gimnaziju u Tešnju. Nakon srednje škole, upisao je Medicinski fakultet u Sarajevu, gdje je 2014. godine stekao zvanje doktora medicine. Specijalizaciju iz opće hirurgije završio je 2022. godine na UKC Tuzla. Trenutno je zaposlen u Općoj bolnici Tešanj, na Odjelu za hirurgiju. Enes je aktivan u lokalnoj zajednici i prepoznat po svom angažmanu u medicini. Kao sin poginulog borca Armije Bosne i Hercegovine, Enes je duboko vezan za svoju zajednicu. Trenutno obavlja dužnost vijećnika u OV Tešanj ispred Naprijed! Tešanj. Enes se zalaže za unapređenje zdravstvene zaštite u Tešnju, s posebnim naglaskom na modernizaciju zdravstvenih usluga i poboljšanje uvjeta rada za medicinsko osoblje.



11 Zumreta Galijašević Baluković

Dr. sc. Zumreta Galijašević Baluković, rođena 1977. godine u Doboju, živi u Tešnju. Završila je srednju matematičko-fizičko-računarsku školu kao učenica generacije, a diplomirala je na Ekonomskom fakultetu Univerziteta u Sarajevu. Magistrirala je i doktorirala na Ekonomskom fakultetu Sveučilišta Vitez. Radila je u bankarskom sektoru do 2010. godine, a potom se pridružila pokretu osoba sa invaliditetom. Zumreta se fokusira na zagovaranje prava najranjivijih skupina, edukaciju i istraživanje socio-ekonomskih pitanja osoba sa invaliditetom. Aktivno radi na uključivanju invalidnosti u rodne akcije i odbrani prava žena sa invaliditetom. Predsjednica je UO IC za osobe sa invaliditetom 'Lotos' iz Tuzle i članica skupštine Europske mreže za samostalan život ENIL.



12 Kenan Kadribašić

Kenan Kadribašić, rođen 1994. godine u Tešnju, završio je Gimnaziju u Tešnju i Ekonomski fakultet Univerziteta u Tuzli. Trenutno radi kao menadžer za marketing kampanje u američkoj kompaniji Personify Health. Kenan je vodio marketing agenciju u Tešnju i bivši je direktor Nogometnog kluba „TOŠK“ Tešanj. Kenan je aktivan član Crvenog križa, gdje je obavljao funkcije predsjednika mladih Zeničko-dobojskog kantona i Federacije Bosne i Hercegovine. Aktivno radi na projektima sa mladima, za mlade, te je učestvovao u organizaciji mnogih lokalnih i međunarodnih događaja. Njegova posvećenost društvenom angažmanu i razvoju mladih čine ga važnim dijelom tima Naprijed! Tešanj. Kenan se zalaže za stvaranje boljih prilika za mlade i unapređenje njihove budućnosti.



13 Sabina Paravlić

Sabina Paravlić, rođena 1993. godine u Tešnju, živi u Krndiji, Tešanj. Diplomirala je na Farmaceutskom fakultetu Univerziteta u Tuzli i stekla zvanje magistra farmacije. Radila je kao predavač stručnih predmeta farmaceutske struke u JU Srednja tehnička škola Tešanj, te u apotekama JU Apoteka i CMS „Tefarm“ Tešanj i PZU Apoteka „Vitafarm“ Jelah, gdje trenutno radi. Sabina je članica Bosanskog pozorišta Tešanj i zalaže se za poboljšanje kulture, rada pozorišta i zdravstvene zaštite u Tešnju. Njeno profesionalno iskustvo i društveni angažman čine je važnim dijelom tima Naprijed! Tešanj. Vjerujemo da će njen rad doprinijeti poboljšanju kulturnih i zdravstvenih usluga te kvaliteti života naših sugrađana.



14 Emin Brkić

Dr Emin Brkić, rođen 1979. godine u Doboju, završio je osnovnu školu i gimnaziju u Tešnju. Medicinski fakultet u Sarajevu završio je 2006. godine. Zaposlen je u Općoj bolnici Tešanj kao doktor medicine. Specijalizaciju iz opće hirurgije završio je 2012. godine u Univerzitetском kliničkom centru u Tuzli s ocjenom 10. Radi kao specijalista opće hirurgije u Općoj bolnici Tešanj. Subspecijalistički staž iz torakalne hirurgije obavio je u Sarajevu i Institutu za plućne bolesti Vojvodine. Aktivno govori engleski jezik i učestvovao je na brojnim kongresima iz opće i torakalne hirurgije, kao i pulmologije. Dr Brkić se zalaže za poboljšanje zdravstvenih uslova u zdravstvenim ustanovama u Tešnju.



15 Muharem Kurtić

Muharem Kurtić, rođen 1980. godine u Doboju, živi u Lepenici. Završio je srednju medicinsku školu u Tešnju 1999. godine. Zaposlen je u Općoj bolnici Tešanj, služba za transfuziju. Oženjen je i otac dvoje djece. Muharem je dugogodišnji član savjeta MZ Lepenica Tešanjka. Posvećen je poboljšanju uvjeta za pacijente u zdravstvenim ustanovama, te aktivno radi na unapređenju kvalitete zdravstvene zaštite u našoj zajednici. Također je posvećen rješavanju problema u lokalnoj zajednici u MZ Lepenica Tešanjka, te se zalaže za bolju infrastrukturu i uslove života u svojoj mjesnoj zajednici.



16 Vanesa Omerčić

Vanesa Omerčić, rođena 1996. godine u Frankfurtu, Njemačka, trenutno živi u Mračaju, MZ Jelah. Završila je Srednju medicinsku školu u Tešnju, a potom Medicinski fakultet Univerziteta u Tuzli, gdje je stekla zvanje doktora medicine. Vanesa tečno govori njemački i engleski jezik. Vanesa se zalaže za ostanak mladih medicinske struke u Tešnju. Vjeruje da je ključno pružiti podršku i stvoriti prilike za mlade doktore kako bi ostali u svom gradu i doprinosili njegovom razvoju. Njena posvećenost medicini i mladima čini je važnim dijelom tima Naprijed! Tešanj.



17 Sejfo Kruško

Sejfo Kruško, rođen 1961. godine u Miljanovcima, općina Tešanj, gdje i trenutno živi. Završio je srednju školu smjer Mašinbravar u Tešnju te policijsku akademiju na Vracama u Sarajevu. Trenutno je penzioner, a većinu radnog vijeka proveo je radeći u policiji, uključujući 20 godina u Graničnoj policiji BiH. Penzionisan je 2022. godine. Sejfo se zalaže za sigurnost građana Tešnja, za što ima veliko iskustvo stečeno tokom svoje dugogodišnje policijske karijere. Tokom svojih 27 godina službe, Sejfo je stekao brojne certifikate i prošao mnoge edukacije vezane za sigurnost i policijske procedure. Vjeruje da je sigurnost temelj za razvoj i prosperitet zajednice, te je odlučan da doprinese poboljšanju sigurnosnih uslova.



18 Erna Salibašić

Erna Salibašić, rođena 1995. godine, živi u Novom Selu, Tešanj. Završila je Srednju medicinsku školu u Tešnju, a potom i Medicinski fakultet u Tuzli. Radila je dvije godine u Domu zdravlja Tešanj u Službi porodične medicine, Službi hitne medicinske pomoći, Covid ambulanti i vakcinalnom punktu. Trenutno je zaposlena u Općoj bolnici Tešanj na Odjelu za ginekologiju i akušerstvo. Tokom studija, Erna je bila aktivna članica studentskih udruženja, promovirajući zdravlje u općoj populaciji i educirajući studente medicine kroz razne projekte. Erna se zalaže za poboljšanje zdravstvene zaštite i uslova rada u zdravstvenim ustanovama u Tešnju.



19 Mehmedalija Buljubašić

Mehmedalija Buljubašić, rođen 1963. godine u Šijama, živi u Mjesnoj zajednici Šije. Završio je srednju stručnu spremu u Medicinskoj školi u Doboju. Radio je u Neuropsihijatrijskoj bolnici dr. Ivan Barbot Popovača u Hrvatskoj. Tokom agresije na BiH bio je medicinski tehničar u sanitetu. Trenutno radi u Općoj bolnici Tešanj kao medicinski tehničar. Mehmedalija se zalaže za poboljšanje zdravstvenih usluga i uvjeta rada medicinskog osoblja u Tešnju. Njegovo bogato iskustvo i posvećenost medicinskoj struci čine ga važnim dijelom tima Naprijed! Tešanj. Vjeruje da svaka zajednica zaslužuje kvalitetnu zdravstvenu zaštitu i bolje uvjete rada za medicinsko osoblje.



20 Muriz Bošnjak

Muriz Bošnjak, rođen 1996. godine, završio je Behram-begovu medresu u Tuzli i dvije godine studija na Fakultetu informacijskih tehnologija (FIT) u Mostaru. Trenutno je zaposlen u Europulveru, gdje radi na poslovima elektrike, montaže i automatike. Kroz svoj rad stekao je široko tehničko znanje i iskustvo, što mu omogućava da učinkovito doprinosi svom radnom okruženju. Muriz se zalaže za zapošljavanje mladih u Tešnju. Vjeruje da je ključno stvoriti prilike za mlade kako bi ostali u svom gradu i doprinosili njegovom razvoju. Njegova vizija uključuje inicijative za profesionalno usavršavanje, stvaranje novih radnih mjesta i podršku mladim poduzetnicima.



21 Ajla Dubravac

Ajla Dubravac, rođena 1999. godine u Tešnju, trenutno živi u porodičnoj kući u Kraševu. Srednju školu pohađala je u Tešnju, gdje je stekla stručnu spremu farmaceutskog tehničara. Nakon toga upisala je Visoku medicinsku školu zdravstva u Doboju, gdje je završila studije i stekla zvanje diplomiranog medicinaru fizioterapije i radne terapije. Pripravnički staž obavila je u JU Dom zdravlja Tešanj, a nakon toga radila je u ZTC Banja Vrućica Teslić. Ajla se zalaže za samozapošljavanje žena i vjeruje da je ključno pružiti podršku ženama kako bi ostvarile svoje profesionalne ciljeve i doprinijele razvoju zajednice.



22 Amir Kurdić

Amir Kurdić, rođen 1969. godine u Piljužićima, općina Tešanj, završio je srednju školu u Doboju. Njegova profesionalna karijera posvećena je umjetnosti, posebno slikanju pejzaža, gdje se ističe kao slobodni umjetnik. Tokom agresije na BiH, Amir je bio pripadnik Armije Bosne i Hercegovine, komandovao je jedinicom na nivou čete i stekao čin kapetana. Društveno je aktivan, posebno u organizaciji kulturno-zabavnih aktivnosti na prostoru cijele BiH. Amir će se zalagati za unapređenje kulturnih sadržaja i promociju umjetnosti u Tešnju.



23 Hanifa Hadžan

Hanifa Hadžan, rođena 1969. godine u Ljetinici, završila je osnovnu školu Nikola Matković Kolja u Tešanjci 1984. godine. Srednju stručnu školu za zvanje konfektionar kože, krzna i galanterije završila je u Tešnju 1988. godine. Od 1989. godine pa sve do agresije na Republiku Bosnu i Hercegovinu bila je zaposlena u firmi SLOGA Tešanj. Tokom agresije, bila je pripadnica oružanih snaga Armije Republike Bosne i Hercegovine u OG grupa 7 Jug, a zatim 37. Divizije. Od 2002. godine zaposlena je u privatnoj firmi Alpina Bromy na poslovima poslovođe štanceraja. Aktivno je radila u NVO Naša porodica Tešanj i članica je planinarskog društva "Zefir" Gračanica. Hanifa se zalaže za poboljšanje radnih uslova i podršku radnicima u Tešnju.



24 Samir Salkanović

Samir Salkanović, rođen 1980. godine u Tešnju, živi u Medakovu. Završio je srednju stručnu školu u Tešnju. Od 2005. godine zaposlen je u firmi Subašić d.o.o. Jelah, gdje je započeo kao dostavljač, zatim radio kao komercijalista, a trenutno radi kao šef-poslovođa sektora dostave. Samir je izuzetno aktivan u džematu Medakovo, gdje je pokretao brojne akcije i inicijative za unapređenje zajednice. Zbog svoje predanosti i angažmana, predložen je i izabran za člana džematskog odbora, što je funkcija koju obavlja i danas. Njegova posvećenost radu unutar džemata i doprinos zajednici su prepoznati i cijenjeni.



25 Edhem Hasanbašić

Edhem Hasanbašić, rođen u Tešnju, diplomirani je inženjer saobraćaja specijaliziran za drumski i gradski saobraćaj. Svoju srednjoškolsku naobrazbu stekao je u Gimnaziji "Musa Ćazim Ćatić" u Tešnju, a visoko obrazovanje na Saobraćajnom fakultetu u Doboju, gdje je diplomirao sa 240 ECTS bodova. Edhem ima značajno radno iskustvo u industriji, gdje je radio kao mašinski inženjer u tehnologiji - Konstruktor-Tehnolog u kompaniji Prevent FAD d.d. Jelah. Njegove tehničke vještine obuhvataju rad sa Solid, CAD/CAM 2D i 3D nacrtima, izradu tehničkih kalkulacija i razvoj složenih alata i uređaja. Edhem se zalaže za unapređenje saobraćajne infrastrukture i modernizaciju prometnih rješenja u Tešnju.



26 Almina Mehmedović

Almina Mehmedović, rođena 1997. godine u Tešnju, živi u Lepenici (MZ Tešanjka). Završila je srednju medicinsku školu u Tešnju, gdje je stekla zvanje medicinske sestre/tehničara. Trenutno je apsolvant na Visokoj medicinskoj školi zdravstva u Doboju. Od 2017. godine zaposlena je u Općoj bolnici u Tešnju, gdje trenutno radi u Službi mikrobiologije. Almina je posvećena unapređenju zdravstvene zaštite i uvjeta rada medicinskog osoblja u Tešnju. Almina se zalaže za pružanje bolje podrške majkama i djeci, koristeći svoje znanje i iskustvo kako bi poboljšala uvjete za najranjivije skupine u našoj zajednici.



27 Dževad Karapandžić

Dževad Karapandžić, rođen 1996. godine, živi u Vukovu. Završio je srednju Elektrotehničku školu u Tešnju, a svoje školovanje je nastavio na Tehnološkom fakultetu u Tuzli, gdje je stekao zvanje inženjera prehrambene tehnologije. Dževad ima radno iskustvo kao tehnolog u kompaniji AS Jelah, gdje je proveo skoro dvije godine te godinu dana rada na solarnim panelima.



28 Mediha Halep

Mediha Halep, rođena 1984. godine u Doboju, živi u Dobropolju. Udata je i majka dvoje djece. Osnovnu školu završila je na Tešnji, a srednju medicinsku školu u Tešnju, gdje je stekla zvanje medicinske sestre. Trenutno je zaposlena u privatnoj predškolskoj ustanovi "Vesela družina" Tešanj. Student je završne godine studija na Fakultetu za predškolski odgoj i obrazovanje u Tuzli, smjer Vaspitač predškolskih ustanova. Mediha se zalaže za poboljšanje obrazovanja i uslova za djecu u Tešnju. Njeno bogato iskustvo u radu s djecom i predanost njihovom razvoju čine je važnim dijelom tima Naprijed! Tešanj. Aktivno sudjeluje u humanitarnim akcijama i edukacijama, s ciljem pružanja podrške djeci s posebnim potrebama i unapređenja njihovog obrazovanja.



29 Hamzalija Kokić

Hamzalija Kokić, rođen 1993. godine, živi u Džemilić Planjama. Pohađao je mješovitu srednju školu, smjer električar. Ima 13 godina radnog iskustva u firmi Zema doo, gdje je radio na različitim pozicijama: tri godine u magacinu, dvije godine u proizvodnji, pet godina na dostavi i tri godine administrativnog rada u upravi, što je njegova trenutna pozicija. Hamzalija se zalaže za poboljšanje radnih uslova i podršku radnicima u Tešnju. Njegovo dugogodišnje iskustvo u različitim sektorima poslovanja omogućava mu da razumije potrebe radnika i doprinosi boljem radnom okruženju.



30 Amel Bašić

Amel Bašić, rođen 1998. godine, živi u Hrvatinićima, Tešanj. Završio je osnovnu školu Rešad Kadić u Tešnju, a srednjoškolsko obrazovanje stekao je u MSŠ Tešanj, smjer plinski instalater. Amel ima značajno radno iskustvo u firmi HIFA d.o.o. Tešanj, gdje je radio kao prodavač goriva i interni kontrolor benzinskih pumpi. Trenutno je zaposlen kao prodajni referent u firmi LIFE OIL Tešanj. Amel je aktivan u sportu, posjeduje UEFA C licencu za fudbalskog trenera i osnivač je škole fudbala "Titan". Amel se zalaže za unapređenje sportskih aktivnosti i podršku mladim sportistima u Tešnju, vjerujući da sport može igrati ključnu ulogu u razvoju zajednice.

Mehmedović:

Poštovani,

svako od nas treba sebi postaviti logično pitanje: Zašto Naprijed?

Nakon agresije, Bosna i Hercegovina bila je duboko podijeljeno društvo, ali s ogromnim političkim kapitalom i ugledom u svijetu zbog vođenja odbrambeno-oslobodilački rat protiv mnoštva neprijatelja.

Etničku podjelu, koju su proizveli naši susjedi, vrijeme je dodatno učvrstilo, što je dovelo do podijeljenosti bh. društva u gotovo svim aspektima. Takvo stanje, u okvirima dejtonskog ustavno-pravnog uređenja, postaje neodrživo. Pozitivni politički kapital vremenom se topio da bi danas dostigao svoj minimum.

Ujedinjenje bosanskog društva je imperativ političkog pokreta NAPRIJED. Najmanje što nas spaja je bosanska državnost, pripadnost državi Bosni i Hercegovini, a to nas je spajalo i kroz povijest.

Zašto NAPRIJED? Zato što je status quo postao model koji će nas preskupo koštati kao državu. I danas smo zarobljeni u tom stanju, bez mogućnosti institucionalnog odgovora na izazove današnjice.

Nove geopolitičke okolnosti i izazovi su pred Bosnom i Hercegovinom. Naši mladi odlaze zbog pravne i životne nesigurnosti uzrokovane teškom političkom situacijom u Bosni i Hercegovini. Ne vide budućnost ovdje. Zato treba NAPRIJED! Dok cijene rastu, plate stagniraju. Ne oslanjajte se na statistike; pogledajte

šta možete kupiti za svoju platu. Vrijeme je da se zapitamo idemo li u pogrešnom smjeru. Moralna obnova društva je imperativ današnjice u Bosni i Hercegovini! Elementarni moralni principi su obaveza svakog člana zajednice. Zato treba NAPRIJED! Pokret koji će politikom kvaliteta obezbijediti osnovne vrijednosti u političkom životu naše zajednice i promijeniti negativan pogled na politiku i političare. NAPRIJED je već drugačiji od ostalih!

ZAŠTO NAPRIJED? Zato jer je MISIJA ovog pokreta upravo briga o svakom bh. čovjeku od rođenja do kraja života. Djelovati kao opoziciona stranka u Bosni i Hercegovini i izaći na izbore, a s obzirom na opću ekonomsku i društvenu krizu, bez sumnje je "Sizifov posao". No, postoji čuvena poruka Lava Nikolajeviča Tolstoja, ako se jedna grupa nečasnih ljudi domogne vlasti, nužno je da se nađe grupa časnih ljudi da im se suprotstavi. Ovo bi mogao biti jak motiv da se neko danas, posebno mladi ljudi, odluči i odvaži politički angažirati. Bosna i Hercegovina je posebna zbog svog jedinstvenog uređenja temeljenog na Dejtonskom sporazumu. Kao tranzicijska postsocijalistička država, postala je hibrid komunizma i kapitalizma, bez socijalne osjetljivosti.

Iako ima parlamentarnu demokratiju, vladajuće etničke oligarhije čine je autokratskom.

Sadašnji vlastodršci izgradili su tri zasebna režima po etnonacionalnom konceptu.

Trojka, odnosno ponašanje lidera ovih strana (SDP, NiP, NS), u bitnom se ne razlikuje od svojih prethodnika na vlasti. Jednostavno se čini kao da nema izlaza i rješenja ovog zamršenog čvora. Zato treba NAPRIJED!

Alternativa mora dati nadu Bosni i Hercegovini te njenim građanima.

Populizam je postao globalni trend, a razvojem društvenih mreža, ratnohuškačka retorika i govor mržnje u BiH ozbiljno su ugrozili multikulturalno naslijeđe naše zemlje. I najvećim svjetskim umovima

teško je definirati političke i ideološke trendove koji Bosnu i Hercegovinu vuku u srednji vijek. S pozicije teorije političkih doktrina

vrolo je teško razvrstati stranke na ljevicu, centar i desnicu. Političke anomalije stvaraju defetizam i beznađe, pa malo idealista

pokušava promijeniti situaciju. Nekolicina njih okupila se oko stranke NAPRIJED. Vjerujemo u nesalomljiv bosanski duh, koji

kroz historiju nalazi odgovore na sve izazove. Bosanski duh oživljava patriotizam i ljubav prema domovini, koju Bosanci

svakodnevno iskazuju širom svijeta. Time je prožet Program pokreta NAPRIJED, kao i sve ono čime smo iznijeli viziju budućnosti

naše domovine. Naša hrabrost da politički djelujemo unatoč "nemogućim misijama" dovoljno govori o nama. Želimo pokazati da smo

drugačiji, s inovativnim političkim narativom i iskrenim namjerama. Naša su mjerila drugačija jer težimo biti pokret časnih i odvažnih ljudi koji imaju hrabrosti

da ODLUČNO krenu NAPRIJED! Našoj domovini treba reset sistema i drugačiji kadrovski potencijal. Prije svega, treba joj društvo kompetencija i znanja, društvo

poštenih i čestitih kadrova čiji je prag tolerancije na korupciju nulti.

E, zato NAPRIJED treba našoj domovini! Snaga bosanskog duha leži u našoj sposobnosti da prkosom i odlučnošću krčimo puteve koji vode NAPRIJED!



Zvijezde, koraci i novi početak: Otkrijte simboliku logotipa NAPRIJED!

Logo NAPRIJED! sastoji se od dva elementa: čovjeka i zvjezdica.

Prikaz čovjeka koji korača naprijed simbolizira posvećenost političkog subjekta NAPRIJED! ka napretku. Zvijezde predstavljaju našu domovinu Bosnu i Hercegovinu, a istovremeno simboliziraju i Evropsku uniju, kojoj NAPRIJED! nastoji pridružiti našu domovinu.

Sam tekst "NAPRIJED" na logu blago je nagnut prema naprijed, što dodatno naglašava dinamiku za iskorakom i izlaskom iz stagnacije i teškoća koje nas trenutno opterećuju.

NAPRIJED za nas nije samo riječ, već obećanje, poziv na akciju i poziv na buđenje kolektivne svijesti. Boje našeg logotipa – plava i žuta – odabrane su kako bi odrazile simboliku zastave Bosne i Hercegovine, ali i zbog njihovog dubljeg značenja. Plava boja povezuje se s povjerenjem, lojalnošću i stabilnošću, dok žuta simbolizira optimizam, nadu i novi početak. Zajedno, ove boje šalju poruku da je NAPRIJED! politički subjekt na kojeg se možete osloniti da Bosnu i Hercegovinu povede NAPRIJED!.

Država kao imperativ, sigurnost, moralna obnova društva, iseljništvo, ekologija, mladi, neki su od temeljnih principa na kojem mi iz pokreta NAPRIJED! gradimo viziju dostojanstvenog i sigurnog života za sve građane Bosne i Hercegovine. Naša misija je da, kroz političku scenu BiH, postanemo pokret za transformaciju i ozdravljenje bosanskohercegovačkog društva, brinući o svakom čovjeku od rođenja do kraja života.

Pozivamo sve građane da budu dio promjena, da pokažemo bosanski inat kada je najteže. Naša budućnost je onakva kakvu želimo. Snaga bosanskog duha leži u našoj sposobnosti da s prkosom i odlučnošću krčimo puteve koji vode NAPRIJED!



NAPRIJED BOSNA I HERCEGOVINA!

Zmaja od Bosne 7
71 000 Sarajevo
info@naprijed.ba
033/862 535
www.naprijed.ba